

## **RELACION SHPJEGUES**

### **PËR PROJEKTVENDIMIN E KËSHILLIT TË MINISTRAVE**

#### **PËR MIRATIMIN E PLANIT KOMBËTAR TË VEPRIMIT TË GARANCISË EVROPIANE PËR FËMIJËT 2026-2030**

##### **I. QËLLIMI I PROJEKTAKTIT DHE OBJEKTIVAT QË SYNOHEN TË ARRIHEN**

Me anë të këtij projektvendimi realizohet miratimi i Planit Kombëtar të Veprimit të Garancisë Evropiane për Fëmijët 2026-2030. Ky plan veprimi përcakton masat prioritare për zbatimin e Rekomandimit të Këshillit të Bashkimit Evropian të datës 14 qershor 2021 për themelimin e Garancisë Evropiane për Fëmijët (Rekomandimi i Këshillit (BE) 2021/1004 i datës 14 qershor 2021 për krijimin e një Garancie Evropiane për Fëmijët OJ L 223, 22.6.2021, fq 14–23), duke reflektuar angazhimin e Shqipërisë për të garantuar mbrojtjen sociale dhe përfshirjen e barabartë të çdo fëmije. Objektivi kryesor i këtij plani është parandalimi i përjashtimit social dhe sigurimi i aksesit efektiv e gjithëpërfshirës në shërbime themelore për fëmijët në nevojë. Sipas përkufizimit që përdor Bashkimi Evropian, kategoria “fëmijë në nevojë”, u referohet të miturve nën 18 vjeç në rrezik varfërie ose përjashtimi social, të cilët duhet të përfitojnë akses falas dhe efektiv në edukimin dhe kujdesin në fëmijërinë e hershme, arsimin e detyrueshëm dhe atë të mesëm (përfshirë aktivitetet jashtëshkollore), garantimin e të paktën një vakti ushqimor të shëndetshëm çdo ditë shkollorë, kujdesin shëndetësor; si dhe akses efektiv në ushqyerjen e shëndetshme dhe strehim të përshtatshëm. Në përputhje me objektivat dhe standardet e Garancisë Evropiane për Fëmijët, plani ndërthur politika dhe masa të integruara ndërsektoriale në arsim, shëndetësi, mbrojtje sociale dhe strehim, në nivel kombëtar, vendor e komunitar, duke synuar një qasje gjithëpërfshirëse e të koordinuar.

Plani i veprimit ka gjashtë fusha veprimi dhe disa objektiva që synohen të arrihen përmes tij si mbrojtja dhe mirëqenia e fëmijëve; edukimi dhe kujdesi në fëmijërinë e hershme (EKFH); arsimi; shëndetësia; mirëushqyerja dhe strehimi.

##### **II. VLERËSIMI I PROJEKTAKTIT NË RAPORT ME PROGRAMIN POLITIK TË KËSHILLIT TË MINISTRAVE, ME PROGRAMIN ANALITIK TË AKTEVE DHE DOKUMENTE TË TJERA POLITIKE**

Projektakti i propozuar është në përputhje me Programin Politik, Pika 3 “Mirëqenie për të gjithë”, pika 3.1 “Fëmijët dhe të rinjtë”. Ky akt është në përputhje me Strategjinë Kombëtare të Mbrojtjes Sociale, të miratuar me Vendimin nr.152, datë 13.03.2024, të Këshillit të Ministrave dhe në përputhje me Planin Kombëtar të Integritimit Evropian 2024 - 2026 miratuar me Vendim të Këshillit të Ministrave nr. 16, datë 11.1.2024.

Akti hartohet në përputhje me Programin e Përgjithshëm Analitik të Projektakteve për vitin 2025, të miratuar me vendim nr. 818, datë 26.12.2025 të Këshillit të Ministrave.

### **III. ARGUMENTIMI I PROJEKTAKTIT LIDHUR ME PËRPARËSITË, PROBLEMATIKAT, EFEKTET E PRITSHME**

Garancia e Fëmijëve është një nga prioritetet e Garancisë Evropiane të Fëmijëve. Neni 11(c) i Rekomandimit të KE u kërkon shteteve anëtare të hartojnë plane veprimi për zbatimin e garancisë së fëmijëve. Ky rekomandim u është drejtuar edhe vendeve kandidatë për anëtarësim në BE. Qëllimi kryesor i planit të veprimit është të përshkruajë masat politike kombëtare dhe vendore ekzistuese dhe të planifikuara, të cilat synojnë përmirësimin e aksesit të fëmijëve në bashkësinë e shërbimeve kyç që mbulohen në Garancinë Evropiane të Fëmijëve.

Varfëria e fëmijëve në Shqipëri mbetet një sfidë strukturore, me ndikime afatgjata në mirëqenien dhe përfshirjen sociale të fëmijëve. Identifikimi i grupeve specifike të fëmijëve me rrezik të shtuar për varfëri ose përjashtim social, si dhe analizimi i faktorëve që i ekspozojnë ata ndaj kësaj situate, përbën një hap themelor për hartimin dhe zbatimin e masave të përshatshme, të synuara dhe gjithëpërfshirëse në kuadër të Garancisë për Fëmijët. Për shkak të kompleksitetit të varfërisë në fëmijëri dhe mbivendosjes së rreziqeve, fëmijët shpeshherë i përkasin më shumë se një kategorie në të njëjtën kohë, duke i bërë edhe më të çnueshëm dhe më të vështirë për t'u identifikuar dhe mbështetur në mënyrë efektive.

Në këtë kuptim, kategorizimi i fëmijëve në nevojë nuk mund të jetë i ngurtë dhe i kufizuar vetëm në një kriter si të ardhurat, por duhet të përfshijë edhe dimensione të tjera, si kushtet e strehimit, statusi ligjor, gjendja shëndetësore (fizike dhe mendore), etnia, prejardhja migratore, përkujdesja prindërore, prania e dhunës apo përfshirja në kujdes alternativ. Ky trajtim gjithëpërfshirës është në përputhje me qasjen e përkufizuar në pikën 5, të Rekomandimit të Këshillit të BE-së mbi Garancinë për Fëmijët.<sup>1</sup>

Për më tepër, përmasat rajonale të varfërisë dhe diferencat territoriale në aksesin ndaj shërbimeve janë faktorë shtesë, që ndikojnë në përkeqësimin e pabarazive dhe përforcojnë përjashtimin social. Të dhënat administrative dhe statistikave kombëtare tregojnë se fëmijët që jetojnë në zonat rurale dhe të thella malore përballen me një sërë pengesash strukturore dhe institucionale për të përfituar nga shërbimet bazë, si arsim, shëndetësi, ushqyerje e shëndetshme dhe mbrojtje sociale.

Kategoritë e fëmijëve në rrezik përfshijnë:

- **Fëmijët nga familje me të ardhura të ulëta**, të cilët përballen me një rrezik më të lartë përjashtimi nga shërbimet thelbësore. Këto familje shpesh nuk kanë akses të mjaftueshëm në arsim, kujdes shëndetësor dhe ushqim për shkak të barrierave ekzistuese dhe mbulimit të kufizuar me shërbime. Gjithashtu, fëmijët në zonat rurale dhe periurbane kanë më shumë gjasa të përjetojnë vulnerabilitete shumëdimensionale, të cilat duhen marrë në konsideratë gjatë hartimit të politikave.

---

<sup>1</sup> Council Recommendation (EU) 2021/1004 of 14 June 2021 establishing a European Child Guarantee.

- **Fëmijët romë dhe egjiptianë, të cilët** përbëjnë më pak se 1% të popullsisë (Censi 2023), 7.1% të përfituesve të ndihmës ekonomike (4.225) dhe 28.5% të atyre në kujdes rezidencial (të dhëna administrative nga SHSSH). Këto komunitete përballen me papunësi afatgjatë, kushte të papërshtatshme strehimi, diskriminim dhe akses të kufizuar në shërbime thelbësore cilësore. Qasja në shërbime mbetet e pabarabartë për shkak të barrierave gjuhësore e kulturore dhe diskriminimit. Megjithatë, në shumë rajone mungojnë të dhënat e disagreguara, gjë që ndikon në shënjestrimin efektiv përmes shërbimeve të përshtatshme.
- **Fëmijët me aftësi të kufizuara**, pavarësisht progresit të ndjeshëm në vitet e fundit, si investimet në infrastrukturë, zgjerimi i shërbimeve psikosociale në sistemin arsimor dhe shëndetësor, rritja e numrit të mësuesve ndihmës në arsimin parauniversitar dhe investimet në ngritjen e kabineteve zhvillimore - shumë prej tyre ende përballen me përjashtim social për shkak të aksesit të ulët në shërbime, shtrirjes së tyre të kufizuar, si edhe mungesës së stafit mbështetës, pajisjeve ndihmëse mësimore apo zbatimit të planeve individuale arsimore.
- **Fëmijët pa kujdes prindëror**, numri i fëmijëve në kujdes institucional është ulur me 30% gjatë gjashtë viteve të fundit, duke reflektuar përpjekjet për deinstitutionalizim. Edhe pse ka patur progres lidhur me deinstitutionalizimin, kujdesi alternativ në familje kujdestare është në hapat e parë. Riintegrimi i fëmijëve në familje biologjike ose të zgjeruara nuk gjen mbështetje të mjaftueshme në nivel vendor për shkak të mungesës së kapaciteteve.
- **Fëmijët që kanë nevojë për mbrojtje përballen me rreziqe të vazhdueshme:** ata që përjetojnë dhunë, abuzim, neglizhencë ose në rrezik trafikimi mbeten kryesisht të pambrojtur për shkak të mungesës së ekipeve multidisiplinare të mbrojtjes, mekanizmave të pamjaftueshëm të ankimeve dhe alternativave minimale të bazuara në familje. Të miturit e pashoqëruar dhe fëmijët migrantë, kryesisht nga Siria dhe Afganistani, përballen me vështirësi për shkak të mungesës së shërbimeve të përshtatshme. Shërbimet parandaluese dhe kapacitetet e menaxhimit të rasteve janë të pazhvilluara në pjesën më të madhe të bashkive.

Në përputhje me Shtyllën Evropiane të të Drejtave Sociale, vendi është i angazhuar të ulë ndjeshëm deri në vitin 2030 numrin e fëmijëve në rrezik varfërie ose përjashtimi, duke synuar thyerjen e ciklit të varfërisë dhe krijimin e mundësive më të barabarta për të gjithë fëmijët.

Në këtë plan janë përcaktuar treguesit deri në vitin 2030, të cilët nisen nga një bazë reale të dhënash.

#### **IV. VLERËSIMI I LIGJSHMËRISË, KUSHTETUTSHMËRISË DHE HARMONIZIMI ME LEGJISLACIONIN NË FUQI VENDAS E NDËRKOMBËTAR**

Projektvendimi është hartuar në mbështetje të nenit 100 të Kushtetutës, me propozim të ministrit të Shëndetësisë dhe Mirëqenies Sociale.

## **V. VLERËSIMI I SHKALLËS SË PËRAFRIMIT ME ACQUIS TË BASHKIMIT EVROPIAN (PËR PROJEKTAKTET NORMATIVE)**

Projektakti është në linjë me Rekomandimin e i Këshillit (BE) 2021/1004, i datës 14 qershor 2021, për krijimin e një Garancie Evropiane për Fëmijët OJ L 223, 22.6.2021, f. 14–23; Komunikimin nga Komisioni për Parlamentin Evropian, Këshillin, Komitetin Ekonomik dhe Social Evropian dhe Komitetin e Rajoneve mbi Strategjinë Evropiane të Kujdesit COM/2022/440 final.

## **VI. PËRMBLEDHJE SHPJEGUESE E PËRMBAJTJES SË PROJEKTAKTIT**

Plani Kombëtar i Veprimit të Garancisë Evropiane për Fëmijët 2026-2030 bazohet në strategjitë sektorale për periudhën 2026–2030, duke prezantuar veprime të synuara që adresojnë të drejtat dhe nevojat e fëmijëve në rrezik. Plani gjithashtu, thekson bashkëpunimin ndërsektorial ndërmjet shëndetësisë, strehimit, arsimit dhe migracionit, me synimin për të trajtuar varfërinë dhe cënueshmëritë e fëmijëve përmes objektivave që përforcojnë njëra tjetrën, si më poshtë:

### **1. MBROJTJA DHE MIRËQENIA E FËMIJËVE (fokus ndërsektorial)**

**Objektivi Specifik 1: Krijimi i një sistemi gjithëpërfshirës dhe të barabartë të përfitimeve për fëmijë, që siguron një standard bazë jetese për të gjithë fëmijët.**

Ky objektivi synon të garantojë një standard minimal jetese për çdo fëmijë dhe të kontribuojë në reduktimin e varfërisë së fëmijëve, përmes një skeme të përfitimit universal të mbështetjes për fëmijët. Objektivi reflekton angazhimin për të ndërtuar një sistem mbrojtës më gjithëpërfshirës, të bazuar në të dhëna dhe të ndjeshëm ndaj nevojave të fëmijëve, në përputhje me udhëzimet e Bashkimit Evropian për Garancinë e Fëmijëve.

Deri në vitin 2026, synohet të miratohet kuadri politik dhe rregullator për Përfitimin për Fëmijë, përfshirë përcaktimin e kriterëve të përfitimit, mënyrën dhe periodicitetin e pagesës. Gjithashtu, do të ndërmerret një fushatë gjithëpërfshirëse informimi për të garantuar transparencën dhe ndërgjegjësimin në nivel kombëtar dhe vendor dhe do të ndërtohet një kuadër i posaçëm monitorimi dhe vlerësimi për të ndjekur efektet e masës dhe për të orientuar përmirësimet.

#### **Masa prioritare:**

1. Miratimi i kuadrit politik dhe rregullator për Përfitimin për Fëmijët.

**Objektivi Specifik 2: Garantimi i mbështetjes financiare dhe me shërbime të specializuara dhe komunitare të integruara për fëmijët me aftësi të kufizuara.**

Ky objektivi synon të garantojë mbështetje të drejtë dhe gjithëpërfshirëse për fëmijët me aftësi të kufizuara dhe ndihmësit personalë, përmes përmirësimit të përfitimeve financiare, shtrirjes

së mbulimit me sigurime shoqërore për ndihmësit personalë, pajisjes së qendrave me teknologji ndihmëse dhe forcimit të mekanizmave të vlerësimit dhe referimit. Përmes protokolleve që lidhin ndihmën ekonomike me shërbimet e kujdesit, si dhe trajnimeve të standardizuara për komisionet multidisiplinare, synohet të krijohet një sistem i integruar dhe i ndjeshëm ndaj nevojave të fëmijëve me aftësi të kufizuara, në përputhje me parimet e Garancisë Evropiane për Fëmijët.

#### **Masat prioritare:**

1. Sigurimi i mbështetjes së përshtatshme financiare për fëmijët me aftësi të kufizuara dhe ndihmësit e tyre personalë.
2. Pajisja e qendrave komunitare dhe ditore me mjete/teknologji ndihmëse.
3. Forcimi i kapaciteteve të komisioneve shumëdisiplinore.
4. Harmonizimi i mbështetjes financiare (në lekë) dhe shërbimeve të integruara socio shëndetësore për fëmijët me aftësi të kufizuara në nivel bashkie.

#### **Objektivi Specifik 3: Garantimi i aksesit për fëmijët vulnerabël në shërbime sociale të integruara, cilësore dhe të bazuara në komunitet, nëpërmjet një ekipi të profesionalizuar dhe bashkëpunimit ndërsektorial.**

Ky objektivi synon të forcojë ofrimin e shërbimeve sociale për fëmijët në nivel vendor përmes fuqizimit të kapaciteteve të profesionistëve dhe ngritjes së mekanizmave funksionalë të bashkëpunimit ndërsektorial. Nëpërmjet trajnimit për punonjësit e vijës së parë, përfshirjes së mësuesve dhe profesionistëve të shëndetësisë në menaxhimin e rasteve dhe përmirësimit të koordinimit ndërmjet aktorëve kryesorë, synohet të mundësohet një qasje më gjithëpërfshirëse dhe e orientuar drejt fëmijëve. Aktivitetet përfshijnë zhvillimin dhe miratimin e protokolleve kombëtare për referim dhe bashkëpunim ndërsektorial, për të siguruar mbrojtje dhe mbështetje të koordinuar për fëmijët në rrezik.

#### **Masa prioritare:**

1. Forcimi i koordinimit ndërsektorial dhe menaxhimit të rasteve të fëmijëve në nevojë mbrojtje.

#### **Objektivi Specifik 4: Rritja e mirëqenies së fëmijës dhe familjes përmes mbrojtjes gjithëpërfshirëse dhe shërbimeve të specializuara të mbrojtjes dhe me bazë komunitare për fëmijët në rrezik.**

Ky objektivi synon të promovojë mirëqenien afatgjatë të fëmijëve në situata të vështira përmes ofrimit të shërbimeve të orientuara drejt parandalimit, ndërhyrjes së hershme dhe mbështetjes afatgjatë në trajtimin dhe menaxhimin e rastit. Në thelb të këtij objektivi është zhvillimi i qendrave të integruara për fëmijë dhe familje, ofrimi i programeve të prindërimit për familjet me të ardhura të ulëta, zgjerimi i mbështetjes për raste traume dhe si pasojë e dhunës ndaj së cilës janë të ekspozuar, forcimi i mekanizmave për kujdes alternativ dhe deinstitutionalizim. Njëkohësisht, synohet sigurimi i mbrojtjes gjithëpërfshirëse për fëmijët në situatë migratore, të

miturit e pashoqëruar dhe ata në institucione të përkujdesit rezidencial, përmes qasjeve të bazuara në plane individuale dhe garantimit të aksesit në shërbime të domosdoshme.

#### **Masat prioritare:**

1. Zgjerimi i shërbimeve mbështetëse për fëmijët dhe familjen, duke përfshirë mbështetjen për prindërim pozitiv dhe kujdesin e qëndrueshëm në komunitet.
2. Ngritja e qendrave me një ndalesë për kujdes shumëdisiplinor e të informuar mbi traumën.
3. Forcimi i kujdesit alternativ dhe transformimi i kujdesit rezidencial në shërbime alternative për fëmijët.
4. Sigurimi i mbështetjes sistematike për fëmijët në situata migratore dhe të pashoqëruar.

#### **Objektivi Specifik 5: Fuqizimi dhe zgjerimi i shërbimeve për fëmijët me aftësi të kufizuara përmes ngritjes së shërbimeve me bazë komunitare, ekipeve lëvizëse, ndihmësve personalë të trajnuar dhe identifikimit të hershëm.**

Ky objektivi synon të sigurojë gjithëpërfshirjen e fëmijëve me aftësi të kufizuara në jetën komunitare, duke reduktuar varësinë nga kujdesi institucional dhe duke adresuar pabarazitë territoriale në akses në shërbime. Përmes zgjerimit të shërbimeve të lëvizshme dhe të ofruara në banesë, përfshirjes së ndihmësve personalë të trajnuar dhe ndërhyrjes së hershme për rastet e fëmijëve me probleme të zhvillimit, objektivi synon të forcojë barazinë dhe të përmirësojë rezultatet në zhvillimin e fëmijës. Qasja është e integruar dhe shumësektoriale, duke përfshirë institucionet e arsimit, shëndetësisë dhe mbrojtjes sociale, në përputhje me parimet e Konventës për të Drejtat e Personave me Aftësi të Kufizuara.

#### **Masat prioritare:**

1. Zgjerimi i shërbimeve të specializuara alternative për fëmijët me aftësi të kufizuara dhe familjet e tyre.
2. Profesionalizimi i fuqisë punëtore, që mbështet fëmijët me aftësi të kufizuara.
3. Fuqizimi i sistemit të identifikimit dhe ndërhyrjes së hershme.

#### **Objektivi Specifik 6: Sigurimi i aksesit universal dhe të barabartë në shërbimet e shëndetit dhe zhvillimit të fëmijës, përmes zgjerimit të shërbimeve në terren, forcimit të llogaridhënies dhe nxitjes së identifikimit të hershëm dhe përfshirjes.**

Ky objektivi synon të zgjerojë qasjen në shërbime themelore të zhvillimit dhe kujdesit për fëmijët, duke prioritetizuar fëmijët në komunitetet me rrezikshmëri më të lartë të varfërisë dhe përjashtimit social, si komunitetet rome dhe egjiptiane, ata në zonat rurale ose fëmijët e paregjistruar ose të pavaksinuar. Objektivi inkurajon shtrirjen kombëtare të programit të vizitave në banesa, fushatave të depistimit dhe ndërhyrjeve të hershme përmes bashkëpunimit ndërsektorial dhe angazhimit të komunitetit. Gjithashtu, synon forcimin e llogaridhënies së rregullt dhe pjesëmarrjes së prindërve përmes mekanizmave të mbledhjes së mendimeve dhe sistemeve të monitorimit të performancës. Aktivitetet e tjera lidhen me zhvillimin e fëmijës me

qasje gjithëpërfshirëse dhe fushatave të drejtuara nga vetë nxënësit për shkolla më të sigurta dhe pa bullizëm.

### **Masat prioritare:**

1. Zgjerimi i shërbimeve të informimit dhe identifikimit të hershëm për zhvillimin e fëmijës.
2. Forcimi i llogaridhënies dhe monitorimit të performancës së shërbimeve vendore shëndetësore dhe kujdesit shoqëror për të ofruar shërbime të integruara dhe të ndjeshme ndaj kulturës për shëndetin e fëmijëve, me fokus fëmijët në rrezik.
3. Promovimi i gjithëpërfshirjes për zhvillimin e fëmijëve dhe shkolla të sigurta.

## **2. EDUKIMI DHE KUJDESI NË FËMIJËRINË E HERSHME (EKFH)**

**Objektivi Specifik 1: Zbatimi i masave që promovojnë aksesin gjithëpërfshirës dhe përmirësojnë cilësinë e shërbimeve të edukimit dhe kujdesit në fëmijërinë e hershme (0-6), me vëmendje të veçantë te fëmijët nga familje me të ardhura të ulëta dhe zona të largëta.**

Ky objektivi specifik synon të adresojë barrierat në akses dhe cilësi në EKFH përmes rritjes së regjistrimit të fëmijëve, sidomos atyre nga familjet në rrezik, dhe përmirësimit të raportimit dhe qartësisë të strukturës qeverisëse të EKFH në nivel kombëtar dhe vendor. Shqipëria synon të zgjerojë aksesin gjithëpërfshirës dhe të përmirësojë cilësinë e edukimit dhe kujdesit në fëmijërinë e hershme (EKFH) për të gjithë fëmijët 0–6 vjeç, me fokus të veçantë te familjet me të ardhura të ulëta dhe zonat e largëta. Për të rritur përfshirjen, sidomos për grupmoshën 0–3 vjeç, do të zbatohen masa për të shtuar vendet në çerdhe dhe kopshte, fushata informimi për familjet dhe mbështetje për regjistrim. Gjithashtu, përmes bashkëpunimit me INSTAT, synohet të krijohet një mekanizëm raportimi vjetor që pasqyron të dhëna të detajuara sipas grupmoshave, gjinisë, vendbanimit dhe statusit socio-ekonomik.

### **Masat prioritare:**

1. Zbatimi i ndërhyrjeve për të rritur regjistrimin në EKFH, me fokus në aksesin e fëmijëve në rrezik dhe zona të largëta.
2. Përcaktimi dhe forcimi i kuadrit qeverisës për edukimin dhe kujdesin në fëmijërinë e hershme përmes përcaktimit të roleve, përgjegjësisë dhe mekanizmave të qartë të përgjegjshmërisë për autoritetet kombëtare dhe vendore.

**Objektivi Specifik 2: Përmirësimi i cilësisë së edukimit dhe kujdesit në fëmijërinë e hershme përmes standardeve të harmonizuara, kurrikulës dhe zhvillimit profesional.**

Ky objektivi synon të sigurojë cilësi të qëndrueshme dhe të barabartë në shërbimet e edukimit dhe kujdesit në fëmijërinë e hershme në të gjithë vendin. Për të arritur këtë qëllim, institucionet përgjegjëse angazhohen të miratojnë standarde kombëtare cilësie për EKFH të harmonizuara me Kornizën Evropiane të Cilësisë, duke garantuar që të gjitha institucionet të ofrojnë mjedise mbështetëse, gjithëpërfshirëse dhe të orientuara drejt zhvillimit të fëmijës. Një kurrikul

kombëtare e unifikuar për grupmoshën 0–6 vjeç do të hartohet dhe zbatohet me fokus në përfshirjen, mirëqenien dhe zhvillimin holistik.

#### **Masat prioritare:**

1. Miratimi dhe zbatimi i standardeve kombëtare të cilësisë për EKFH në përputhje me Kornizën Evropiane të Cilësisë.
2. Zhvillimi i një kurrikule të unifikuar kombëtare për grupmoshat 0–3 dhe 3–6 vjeç, me theks në përfshirje, mirëqenie dhe zhvillim të qendrueshëm.
3. Harmonizimi i kualifikimeve me standardet e Kornizës Evropiane të Kualifikimeve (KEK/EQF) dhe zgjerimi i programeve të strukturuar për zhvillimin e vazhdueshëm profesional për fuqinë punëtore të EKFH.

### **3. ARSIMI**

#### **Objektivi Specifik 1: Trajtimi i pengesave financiare dhe jo-financiare për pjesëmarrjen në shkollë.**

Ky objektivi synon të garantojë që çdo fëmijë, pavarësisht statusit socio-ekonomik, të ketë akses të barabartë në arsim cilësor. Aktivitetet fokusohen në zhvillimin e një kuadri të unifikuar për kriteret e përfitimit të mbështetjes gjithëpërfshirëse, i cili do të udhëheqë bashkitë dhe ofruesit e shërbimeve në regjistrimin dhe frekuentimin në shkollë të fëmijëve në rrezik. Për më tepër, aktivitetet e përfshira nën këtë objektivi synojnë sigurimin e aksesit falas në materiale shkollore për fëmijët nga familjet vulnerabël dhe pilotimin e një skeme mbështetëse me kushte për nxënësit në rrezik të braktisjes së arsimit të mesëm të lartë dhe lidhjen me sistemin e paralajmërimit të hershëm për parandalimin e braktisjes shkollore.

#### **Masat prioritare:**

1. Konsolidimi i masave të përfshirjes sociale sipas një kuadri të unifikuar të kriterëve të përfitimit.
2. Sigurimi i aksesit falas në materiale bazë shkollore për fëmijët në nevojë.
3. Pilotimi i një skeme mbështetjeje për fëmijët në rrezik të lidhur me paralajmërimin e hershëm për parandalimin e braktisjes shkollore në arsimin e mesëm të lartë.

#### **Objektivi Specifik 2: Fuqizimi i shkollave për të qenë gjithëpërfshirëse dhe promovuese të mjediseve të barabarta mësimore.**

Për të siguruar që çdo fëmijë të përfitojë nga një mjedis i përshtatshëm për mësim dhe zhvillim, aktivitetet fokusohen në fuqizimin e rolit të qendrave burimore për të ofruar trajnime të vazhdueshme për mësuesit ndihmës dhe për përditësimin e Planeve të Edukimit Individual (PEI) sipas standardeve kombëtare. Propozohet të kryhet një hartëzim i nevojave në shkolla për të identifikuar mungesat në infrastrukturën gjithëpërfshirëse dhe hartimin e planeve të ndërhyrjeve në nivel bashkie për përshtatjen e infrastrukturës shkollore. Vëmendje e veçantë do t'i kushtohet integritetit të komponentëve të edukimit gjithëpërfshirës në kurrikulën e

formimit të mësuesve, si dhe zhvillimit të moduleve digjitale dhe metodave hibride të mësimdhënies për zonat me mungesë shërbimesh dhe me komunitete pakicash, dhe do të zhvillohet një program kombëtar. Gjithashtu, synohet që përmes programit “Pas shkolle”, të mbështeten nxënësit me kryerjen e detyrave të shtëpisë, mësimin dhe zhvillimin gjithëpërfshirës përmes aktiviteteve artistike, sportive dhe aftësive digjitale.

#### **Masat prioritare:**

1. Fuqizimi i rolit të qendrave burimore në ofrimin e trajnimit dhe mbështetjes së vazhdueshme për mësuesit në arsimin gjithëpërfshirës dhe mësuesve ndihmës dhe përditësimin e PEI, për fëmijët me aftësi të kufizuara.
2. Përmirësimi i aksesueshmërisë dhe integritit të planeve universale në shkollat ekzistuese.
3. Forcimi i kapaciteteve të mësuesve dhe stafit të shkollës në arsimin gjithëpërfshirës.
4. Shtrirja e moduleve digjitale dhe materialeve hibride të mësimdhënies për zonat me burime të pamjaftueshme dhe dominancë të minoriteteve për të përmirësuar aksesin në arsim dhe gjithëpërfshirjen.
5. Zbatimi i programeve që kombinojnë mbështetjen mësimore dhe aktivitetet jashtëshkollore përmes integritit të metodologjisë UPSHIFT dhe programeve “Pas shkollës”, për zhvillimin e aftësive të shekullit 21 dhe përfshirjen e fëmijëve nga grupet në nevojë.

#### **4. SHËNDETËSIA**

##### **Objektivi Specifik 1: Garantimi i aksesit të barabartë në shërbimet bazë dhe të integruara shëndetësore për fëmijët, me fokus në kategoritë në rrezik.**

Për të kontribuar në mbulim universal dhe ndërveprimin mes shërbimeve të integruara për fëmijët në nevojë, përmes shëndetit parësor, mbrojtjes së fëmijëve, regjistrimit elektronik, sistemit të paralajmërimit të hershëm dhe gjendjes civile, aktivitetet përfshijnë trajnimin e profesionistëve të kujdesit parësor shëndetësor për identifikim të hershëm të rreziqeve dhe lidhjen me shërbimet rehabilituese dhe mbështetëse për fëmijët me aftësi të kufizuara. Gjithashtu, do të zgjerohet shërbimi i ekzaminimit shëndetësor për të përfshirë aspekte të shëndetit mendor, dëgjimit, të ushqyerit dhe shëndetit oral. Programi i vizitave në shtëpi do të zgjerohet në të gjitha bashkitë, me ekipe të trajnuara për ndjekjen e fëmijëve në zona rurale dhe komunitete të marginalizuara. Po ashtu, do të pilotohet sistemi elektronik i regjistrimit shëndetësor për fëmijët, duke mundësuar ndjekjen në kohë reale të aksesit dhe ndërhyrjeve.

#### **Masat prioritare:**

1. Konsolidimi dhe përmirësimi i shërbimeve shëndetësore për fëmijët në rrezik.
2. Zgjerimi dhe shkallëzimi i shërbimeve të kujdesit parësor shëndetësor përmes zbatimit kombëtar të Programit të Vizitave në Shtëpi, me fokus në komunitetet rurale, të largëta, rome dhe egjiptiane.

3. Ngritja e një sistemi ndërveprues elektronik për regjistrin shëndetësor të fëmijëve, për ofrimin e shërbimeve dhe ndjekjen në kohë reale.

## **Objektivi Specifik 2: Zgjerimi i aksesit në shërbime të decentralizuara dhe gjithëpërfshirëse të shëndetit mendor për fëmijët në nivelin e kujdesit komunitar.**

Ky objektivi synon të garantojë identifikim të hershëm, mbështetje të vazhdueshme dhe qasje të barabartë në shërbimet e shëndetit mendor për fëmijët dhe adoleshentët në rrezik, në përputhje me parimet e kujdesit parësor dhe gjithëpërfshirës. Aktivitetet e planifikuara përfshijnë zhvillimin dhe integrimin e një protokollit të posaçëm për depistimin dhe vlerësimin e shëndetit mendor dhe zhvillimit të fëmijëve 0–6 vjeç, duke përfshirë mjete të standardizuara dhe udhëzime praktike për profesionistët shëndetësorë. Pas fazës së zhvillimit, instrumenti do të rishikohet dhe zgjerohet në nivel kombëtar, duke u bërë pjesë e protokolleve të rregullta të KSHP dhe duke u zbatuar në të gjitha qendrat shëndetësore (QSH).

### **Masat prioritare:**

1. Sigurimi i identifikimit të hershëm të problemeve të shëndetit mendor dhe zhvillimit tek fëmijët vulnerabël përmes instrumenteve të standardizuara të depistimit në kontrollet e kujdesit parësor shëndetësor.
2. Sigurimi i aksesit në shërbimet e shëndetit mendor të fëmijëve nëpërmjet platformave të telepsikiatrisë, veçanërisht në zonat e pashërbyera, për të kapërcyer mungesën e aksesit në specialistë.
3. Zhvillimi i programeve të ndërgjegjësimit dhe komunikimit për ndryshim sjellje në komunitet, ngritja e grupeve të mbështetjes së prindërve për të reduktuar stigmën dhe nxitjen e kërkimit të ndihmës në fazat e hershme.
4. Fuqizimi i ofrimit dhe koordinimit të shërbimeve shëndetësore dhe të integruara shëndetësore-sociale për fëmijët me aftësi të kufizuara në përputhje me politikat kombëtare për aftësinë e kufizuar.

## **5. USHQYERJA E SHËNDETSHME PËR TË GJITHË FËMIJËT**

### **Objektivi 1: Sigurimi i aksesit në ushqim të shëndetshëm për të gjithë fëmijët në nevojë**

Ky objektivi synon sigurimin e aksesit të barabartë në ushqyerje të shëndetshme për fëmijët në nevojë, përmes aktiviteteve që fokusohen në identifikimin e zonave prioritare dhe grupeve më në nevojë, përfshirë fëmijët nga familjet me të ardhura të ulëta, komunitetet rome dhe egjiptiane; krijimit të programeve të shpërndarjes së ushqimeve përmes qendrave me bazë komunitare, të cilat do të shërbejnë si pika të aksesueshme për sigurimin e ushqimit të shëndetshëm për fëmijët në nevojë. Këto qendra do të funksionojnë në bashkëpunim me një rrjet partnerësh vendorë dhe kombëtarë, për të garantuar funksionimin e qëndrueshëm të shërbimeve ushqimore. Parashikohet të realizohet një vlerësim kombëtar për mungesat në mikronutrientë dhe të krijohet një program i synuar fortifikimi sipas udhëzimeve të OBSH-së,

bashkë me trajnimin e stafit dhe integrimin e ndjekjes përmes sistemeve digjitale. Paralelisht, do të standardizohen materialet për këshillimin për ushqyerjen foshnjave dhe fëmijëve të vegjël, do të trajnohet stafi dhe do të krijohen kënde këshillimi në qendrat shëndetësore. Monitorimi i rritjes do të zgjerohet me fokus tek grupet vulnerabël, ndërsa fëmijët në lëvizje dhe ata në zonat rurale do mbështeten përmes ndërhyrjeve ushqimore të integruara në politikat e zhvillimit dhe tregjet lokale.

#### **Masat prioritare:**

1. Ngritja e programeve të ushqyerjes së shëndetshme me bazë komunitare të fokusuar në mirëushqyerjen e fëmijëve.
2. Sigurimi i aksesit në mikronutrientë dhe suplemente thelbësore për fëmijët dhe nënat shtatzëna/laktacion në zonat rurale dhe të largëta, shkolla dhe komunitetin romë, në përputhje me udhëzimet e OBSH-së.
3. Fuqizimi i këshillimit për ushqyerjen e foshnjave dhe fëmijëve të vegjël (UFFV) brenda shërbimeve të kujdesit shëndetësor parësor dhe krijimi i hapësirave të sigurta për këshillim.
4. Përmirësimi i aksesit në ushqime të përballueshme, të shëndetshme të furnizuara nga prodhues vendas përmes nismave të bazuara në komunitet, që promovojnë sigurinë ushqimore dhe bujqësinë e qëndrueshme.

#### **Objektivi Specifik 2: Akses universal në vakte të shëndetshme në shkolla për të përmirësuar mirëushqyerjen, të nxënit dhe barazinë (duke synuar shkollat publike 9-vjeçare).**

Ky objektivi synon të sigurojë akses universal në ushqyerje të shëndetshme përmes një politike kombëtare për ushqimin shkollor, të shoqëruar me standarde ushqimore sipas moshës, një program pilot me vakte falas për shkollat në zonat më të varfra, dhe një plan të detajuar për zbatimin e tij. Parashikohet përmirësimi i infrastrukturës së shkollave për përgatitjen dhe shpërndarjen e vakteve, ngritja e kuzhinave dhe hapësirave të ngrënies, si dhe vendosja e marrëveshjeve të prokurimit me furnitorë lokalë të ushqimeve. Nisma të veçanta parashikohen për edukimin kulturor të përshtatur në komunitetet romë dhe egjiptiane dhe ngritjen e grupeve të mbështetjes për kujdestarët.

#### **Masat prioritare:**

1. Miratimi i një politike kombëtare për ushqimin në shkolla me standarde të përcaktuara sipas moshës dhe në përputhje me rekomandimet e OBSH-së, si dhe pilotimi i vakteve shkollore universale dhe falas në bashkitë më të varfra.
2. Mbështetja e infrastrukturës shkollore dhe kapaciteteve të prokurimit për ofrimin e qëndrueshëm të ushqimit në shkolla.
3. Integrimi i edukimit për mirëushqyerjen në kurrikulat shkollore, aktivitetet jashtëshkollore dhe trajnimin e mësuesve.
4. Ofrimi i edukimit ushqimor të përshtatur sipas kulturës dhe mbështetjes për prindërit/kujdestarët, në komunitetet romë, egjiptiane dhe familjet e cënueshme.

## 6. STREHIMI

### **Objektivi Specifik 1: Transformimi i politikave dhe sistemeve të strehimit drejt një qasjeje gjithëpërfshirëse, të orientuar nga fëmijët dhe bazuar në parimet e barazisë.**

Ky objektivi synon orientimin e politikës së strehimit në Shqipëri drejt nevojave të fëmijëve në situata të cënueshme. Aktivitetet përfshijnë zhvillimin e treguesve të veçantë për fëmijët në bazë të të dhënave ekzistuese për strehimin dhe kategorizimin e tyre sipas moshës, gjinisë, përkatësisë etnike, aftësisë së kufizuar dhe përbërjes familjare. Një tjetër masë e rëndësishme është sigurimi i një shpërndarjeje të drejtë të fondeve të strehimit përmes një vlerësimi kombëtar të nevojave për strehim social të familjeve dhe fëmijëve në rrezik varfërie, si dhe përmes zhvillimit të kriterëve të qarta për shpërndarjen e fondeve, që prioritetizojnë familjet me fëmijë, familjet me një prind dhe ato me shumë fëmijë.

#### **Masat prioritare:**

1. Zhvillimi i treguesve specifikë të strehimit për fëmijët.
2. Sigurimi i shpërndarjes së drejtë të fondeve të strehimit bazuar në varfërinë dhe cënueshmërinë e fëmijëve dhe familjeve.

### **Objektivi Specifik 2: Zgjerimi i aksesit në zgjidhje sensitive për strehimin e fëmijëve, përmes shërbimit të strehimit tranzitor, emergjente dhe afatgjatë të përshtatur për familjet dhe fëmijët në situata të cënueshme.**

Ky objektivi fokusohet në sigurimin e strehimit të përshtatshëm dhe të qëndrueshëm për familjet me fëmijë në rrezik të përjashtimit social. Masa të rëndësishme përfshijnë përmirësimin e skemave të subvencionimit të qirave, ndihmën për shpenzimet e shërbimeve në nivelin e bashkive, rehabilitimin e banesave për familjet me fëmijë në banesa të papërshtatshme dhe zhvillimin e programeve të strehimit të përkohshëm për familjet në rrezik dëbimi. Gjithashtu, masat e parashikuara përfshijnë zbatimin e programeve të specializuara për fëmijët në situata shumë të cënueshme (aftësi të kufizuara), si dhe ndërhyrje për të përmirësuar kushtet në vendbanimet jokonvencionale (kryesisht për komunitetet romë) dhe për të mbështetur fëmijët e pashoqëruar me zgjidhje të përshtatshme të strehimit.

#### **Masat prioritare:**

1. Zgjerimi i skemave të subvencionimit të qirasë, strehimit tranzitor dhe granteve për rehabilitimin e banesave, duke i dhënë përparësi familjeve me fëmijë.
2. Rritja e aksesit në strehim për fëmijët në vendbanime jo-konvencionale.

## **VII. INSTITUCIONET DHE ORGANET QË NGARKOHEN PËR ZBATIMIN E AKTIT**

Institucionet dhe organet që ngarkohen për zbatimin e këtij akti janë: Ministria e Shëndetësisë

---

Relacion shpjegues për projektvendimin “Për miratimin e Planit Kombëtar të Veprimit të Garancisë Evropiane për Fëmijët 2026–2030”

dhe Mirëqenies Sociale, Ministria e Financave, Ministria e Ekonomisë dhe Inovacionit, Ministria e Arsimit, Ministria e Punëve të Brendshme, Ministër i Shtetit për Pushtetin Vendor, Shërbimi Social Shtetëror, Agjencia e Sigurimit të Cilësisë së Kujdesit Shëndetësor dhe Shoqëror, Operatori i Shërbimeve të Kujdesit Shëndetësor, Agjencia Shtetërore për të Drejtat dhe Mbrojtjen e Fëmijës, Inspektorati përgjegjës për shërbimet shoqërore dhe njësitë e vetëqeverisjes vendore.

## **VIII. PERSONAT DHE INSTITUCIONET QË KANË KONTRIBUAR NË HARTIMIN E PROJEKTAKTIT**

Hartimi i këtij plani u koordinua nga Zëvendësministri i Shëndetësisë dhe Mirëqenies Sociale, me asistencë teknike nga UNICEF, me bashkëpunimin e ngushtë të Ministrisë së Arsimit, Ministrisë së Shëndetësisë dhe Mirëqenies Sociale, Ministrisë së Ekonomisë dhe Inovacionit, Ministrisë së Punëve të Brendshme, Agjencisë Shtetërore për Mbrojtjen dhe të Drejtat e Fëmijës dhe Instituti i Statistikave.

Projektakti do të dërgohet për mendim në Ministrinë e Financave, Ministrinë e Drejtësisë, Ministrinë e Ekonomisë dhe Inovacionit, Ministrinë e Arsimit, Ministrit të Shtetit për Pushtetin Vendor, Ministrisë së Punëve të Brendshme, Ministrit të Shtetit dhe Kryenegociatorit, Këshillit Konsultativ të Qeverisjes Qendrore dhe Vetëqeverisjes Vendore dhe Institutit të Statistikave (INSTAT).

Janë zhvilluar dy tryeza diskutimi takime konsultative të ngushta teknike me anëtarë të grupit të punës të ngritur me Urdhër të Ministrit të Shëndetësisë dhe Mbrojtjes Sociale nr. 577/2024 “Për ngritjen e Grupit Teknik Ndërinstitucional të Punës”.

Ministria e Drejtësisë dhe Ministria e Brendshme kanë shprehur dakortësinë.

Ministri i Shtetit dhe Kryenegociator është shprehur që pas marrjes së dakordësisë për përmbushjen e piketës nga Komisioni Evropian, projektvendimi të ridërgohet për dhënie mendimi pranë kësaj ministrie para dërgimit për shqyrtim dhe miratim në Këshillin e Ministrave. Me anë të njoftimit zyrtar nëpërmjet e-mail të datës 22.01.2025 nga kjo ministri është dërguar njoftimi nga Shërbimet e Komisionit Evropian që statusi është “no objection”, për Planin Kombëtar të Veprimit të Garancisë së Fëmijëve.

Ministria e Arsimit është shprehur parimisht dakort me disa sugjerime, ku janë reflektuar të gjitha sugjerimet në dokument si më poshtë:

Lidhur me sugjerimin që kudo në përmbajtje të Planit Kombëtar Ligji nr. 69/2012, “Për sistemin arsimor parauniversitar në Republikën e Shqipërisë”, të citohet i ndryshuar, është reflektuar.

Lidhur me sugjerimin që në faqen 8 të Planit Kombëtar të hiqet togfjalëshi *“bursa të arsimit parashkollor”*, në zbatim të pikës 2 të vendimit nr. 666, datë 10.10.2019, të Këshillit të Ministrave, *“Për kuotat financiare të ushqimit në mensa e konvikte dhe përcaktimin e kriterëve për përfitimin e bursave e të pagesave për nxënësit e arsimit parauniversitar, si dhe format e tjera të përkujdesjes ndaj kategorive të veçanta në institucionet arsimore parauniversitare publike”*, sqarojmë se teksti i referohet përfituesve të Ndihmës Ekonomike (NE) dhe është ndryshuar, sipas sugjerimit si më poshtë:

*“Programi i Ndihmës Ekonomike (NE) shërben edhe si mekanizëm hyrës për përfitime të tjera si përjashtime apo reduktime të tarifave në çerdhe e kopshte, bursa për arsim parauniversitar, përjashtime nga tarifat vjetore të shkollimit universitar dhe shërbime shëndetësore publike falas”.*

Lidhur me sugjerimin që në faqen 12 të Planit Kombëtar dhe kudo në përmbajtje të projektvendimit dhe dokumentacionit shoqërues të tij, togfjalëshi *“Strategjia e Arsimit parauniversitar 2021-2026”*, të unifikohet me togfjalëshin *“Strategjia Kombëtare e Arsimit 2021-2026”* në përputhje me vendimin nr. 621, datë 22.10.2021 të Këshillit të Ministrave, është reflektuar kudo në dokument.

Lidhur me sugjerimin që faqen 33 togfjalëshi *“Institucionet arsimore (shkollat dhe institucionet e edukimit dhe kujdesit të hershëm):”*, të zëvendësohet, me *“institucionet arsimore parauniversitare”*, pasi kujdesi i hershëm përfshin çerdhet, të cilat nuk konsiderohen institucione arsimore, është riformuluar për të integruar dhe çerdhet si vijon *“Shërbimi Social Shtetëror dhe Drejtoritë Rajonale të Shërbimit Social Shtetëror (DRSHSSH) mbikëqyrin konsistencën dhe cilësinë e zbatimit në bashki, ofrojnë asistencë teknike dhe përmbledhin të dhënat për monitorim. Institucionet kujdesit të hershëm (çerdhet) dhe ato arsimore parauniversitare shërbejnë si pika kyçe për identifikimin e hershëm dhe parandalimin e përjashtimit të fëmijëve nga arsimi”.*

Lidhur me sugjerimin që në faqen 38, objektivin specifik 1 të riformulohet masa *“Zhvillimi i një dokumenti politikash”/Ëhite paper”*, që shqyrton skenarët për shpërndarjen e përgjegjësive për arsimin parashkollor (0-6 vjeç)”, pasi arsimit parashkollor përfshin moshën 3-6 vjeç, sqarojmë se *“Ëhite Paper”*, do të përfshijë çerdhet dhe kopshtet dhe masa është riformuluar si vijon: *“Zhvillimi i një dokumenti politikash”/Ëhite paper”*, që shqyrton skenarët për shpërndarjen e përgjegjësive për kujdesin e hershëm (çerdhet, 0-3 vjeç) dhe arsimin parashkollor (3-6 vjeç)”.

Lidhur me sugjerimin që faqen 42, të saktësohet referenca 22 lidhur me institucionin përgjegjës për miratimin e Planit Kombëtar të Veprimit për fuqizimin e mekanizmave të parandalimit të çdo forme dhune e bullizimi për sigurinë në institucionet arsimore parauniversitare”, i cili është miratuar me urdhrin nr. 32, datë 21.01.2025 dhe jo nga Këshilli i Ministrave, është reflektuar.

Lidhur me sugjerimin që faqen 63 në aktivitetet *“2.1. Zhvillimi dhe zbatimi i një kurrikule trajnimi për ndihmësit personalë të fëmijëve me aftësi të kufizuara”* dhe *“3.1. Hartimi i*

*protokolleve dhe trajnimi i profesionistëve të vijës së parë (përfshirë shëndetin mendor dhe arsimin) mbi identifikimin e hershëm dhe mbështetjen e fëmijëve me probleme të zhvillimit” të hiqet Ministria e Arsimit pasi trajnimi i kujdestarëve ligjorë nuk është në fushën e përgjegjësisë së MA, është reflektuar.*

Lidhur me sugjerimin që në aktivitetin 3.1 të kësaj mase shkurtimi “DAR” të hiqet, është reflektuar.

Lidhur me sugjerimin që në faqen 68 në aktivitetin “3.1. Programet në komunitet për regjistrimin e fëmijëve në rrezik në shërbimet parashkollore dhe të zhvillimit të fëmijërisë së hershme”, të hiqen Ministria e Arsimit dhe Njësitë Arsimore Vendore, pasi regjistrimi në arsimin parashkollor dhe në çerdhe nuk është në fushën e përgjegjësisë së këtij institucioni është reflektuar.

Lidhur me sugjerimin që në faqen 72 për masën 2 institucion financues nuk duhet të jetë Ministria e Arsimiti, por MSHMS dhe Njësitë e Vetëqeverisjes Vendore, është reflektuar.

Lidhur me sugjerimin që në faqen 75 në footnote të saktësohet urdhri nr. 31, datë 28.1.2020, “Për miratimin e rregullores për funksionimin e institucioneve arsimore parauniversitare në Republikën e Shqipërisë”, i ndryshuar, është reflektuar.

Lidhur me sugjerimin që në faqen 77 për heqjen e masës 3.1 ofrimi i bursave për nxënësit e shkollave të mesme që janë në rrezik varfërie dhe përjashtimi social, për të zvogëluar barrierat ekonomike dhe për të parandaluar braktisjen e parakohshme të shkollës, pasi një përcaktim i tillë nuk është pjesë e VKM nr. 666/2019, i ndryshuar, është reflektuar duke iu përshtatur VKM-së dhe dhe masës, e cila i referohet vetëm nxënësve në arsimin e mesëm dhe profesional, si vijon:

*“3.1. Ofrimi i bursave për nxënësit që ndjekin arsimin mesëm parauniversitar me kohë të plotë dhe arsim e mesëm profesional që janë në rrezik varfërie dhe përjashtimi social, për të zvogëluar barrierat ekonomike dhe për të parandaluar braktisjen e parakohshme të shkollës”. Ministria e Arsimit është hequr si institucion financues të masës.*

Lidhur me sugjerimin që në faqen 79 në aktivitetin “3.1. Integrimi i komponentëve të arsimit gjithëpërfshirës në kurrikulat e përgatitjes së mësuesve për në fillim të shërbimit”, përgjegjës duhet të jenë institucionet e arsimit të lartë dhe jo MA dhe fjala “universitet”, të zëvendësohet me “institucionet të arsimit të lartë” dhe togfjalëshi “Fakultetet e Edukimit”, të zëvendësohet me “institucionet e arsimit të lartë, që ofrojnë programe studimi në fushën e mësuesisë”, është reflektuar.

Lidhur me saktësimet në aneksin 4 “Dokumentet strategjike dhe ligjet relevante për PKV GF, janë reflektuar të gjithë saktësimet.

Ministria e Financave është shprehur parimisht dakort me disa sugjerime, të cilat janë reflektuar në pjesën e Raportit të Vlerësimit të të Ardhurave dhe Shpenzimeve Buxhetore.

Ministria e Ekonomisë dhe Inovacionit është shprehur parimisht dakord ku janë reflektuar të gjithë sugjerimet si më poshtë:

Lidhur me ndryshimin e emërimit të “*Agjencia Kombëtare e Punësimit dhe Aftësive*”, është reflektuar dhe është hequr si institucion për zbatimin e këtij vendimi, pasi ky institucion nuk ka rolin e zbatuesit kryesor në masat e planit, por është bashkëpërgjegjës me institucione të tjera, konkretisht vetëm te masa 2, objektivi 5 i tij.

Lidhur me objektivin 1.2.1 dhe 1.2.2, ku kërkohet të hiqet nga fusha e përgjegjësisë Ministria e Ekonomisë dhe Inovacionit, sqarohet se nuk është i vetmi institucion përgjegjës por është dhe MSHMS dhe bashkitë, pasi lidhet me vlerësimin e nevojave në të gjithë vendin për strehimin social për familjet dhe fëmijët në rrezik varfërie dhe përjashtimi social.

Lidhur me objektivin 1.3 është saktësuar vlera e objektivit (10 njësi).

Lidhur e kostot e buxhetit për strehimin është e reflektuar në Aneksin nr. 3 të dokumentit të planit të veprimit.

Lidhur me përkufizimin “*Strehim i përshtatshëm*”, është rishikuar sipas nenit 4, të Ligjit nr. 22/2018, “Për strehimin social”, i ndryshuar.

Lidhur me sugjerimet në kreun 7.6 janë riformuluar paragrafët si më poshtë:

“Paragrafi i parë është riformuluar: “*Korniza ligjore për strehimin social synon të mbështesë familjet me të ardhura të ulëta, përfshirë ato me fëmijë. Ligji për Strehimin Social përcakton instrumente si subvencionimi i qirasë, banesat sociale me qira, subvencionimi i interesave të kredisë, grantin e menjëhershëm dhe përmirësimin e kushteve të banesave ekzistuese. Programet zbatohen nga njësitë e qeverisjes vendore, ndërsa familjet me fëmijë përfitojnë përmes sistemit të pikëzimit, i cili vlerëson kushtet e banimit, përbërjen familjare dhe situatën socio-ekonomike.*”

Paragrafi i dytë është riformuluar: “*Për fëmijët ka përparësi në rastet e familjeve me një prind, me shumë fëmijë në ngarkim ose në kujdes alternativ*”.

Gjithashtu, familjet që përfitojnë nga skema e ndihmës ekonomike kanë prioritet për ndihmën në strehim sipas kritereve të ligjit. Ligji parashikon përparësi për fëmijët pa kujdes prindëror, por ligji nuk ka të parashikuar një kuotë fikse të dedikuar për fëmijët për strehim social dhe nuk ndiqet në mënyrë sistematike ndikimi i skemës në mirëqenien e tyre.”

Paragrafi i tretë është riformuluar: *“Familjet shpesh nuk arrijnë të përballojnë kostot reale të tregut, veçanërisht për familjet në kufi ose nën kufirin e varfërisë. Në zonat turistike, fenomeni përkeqësohet nga preferenca e pronarëve për qiramarrës sezonale, duke reduktuar mundësitë për strehim të qëndrueshëm për familjet me të ardhura të ulëta. Aplikimi mund të bëhet online përmes platformës e-albania dhe dokumentacioni për aplikim sigurohet online, automatikisht përmes sistemit, përveç dokumentit të pronësisë si një nga kushtet kryesore ligjore për të përfituar nga programet e strehimit. Një pjesë e konsiderueshme e familjeve vulnerabël nuk kanë akses në internet apo aftësi digjitale për ta përfunduar procesin. Prandaj, shumë prej tyre drejtohen fizikisht në zyrat e bashkive për ndihmë.”*

Paragrafi i pestë, fjalia e parë është riformuluar: *“Procesi i miratimit të aplikimeve nga bashkitë është gjithashtu i gjatë, edhe pse sipas bazës ligjore në fuqi ka një afat të përcaktuar, zakonisht mbi 6 muaj, dhe nuk u përgjigjet nevojave emergjente të strehimit, si në rastet e dhunës në familje ose dëmtimit të papritur të banesës. Paragrafi i shtatë të riformulohet me përmbajtjen si vijon: “Përkundër një game të gjerë programesh të strehimit social zbatimi praktik nga ana e bashkive varion nga qiratë e subvencionuara, përmirësimi i kushteve të banimit, banesat sociale me qira, banesat me kosto të ulët apo strehimi i përkohshëm. Vetëm 30 bashki kanë paraqitur kërkesa për financim për subvencione qiraje në vitin 2025, 52 bashki kanë aplikuar për të përfituar nga përmirësimi i kushteve të banimit, ndonëse nevojat janë të pranishme në gjithë territorin.”*

Lidhur me sugjerimet në tabelën “Sfidat kryesore”, në pikën e parë është hiqur fjala *“i fragmentuar”*, në pikën e dytë është zëvendësuar togfjalëshi *“Pengesat administrative dhe ligjore”* me *“Mungesa e dokumentacionit të pronësisë së banesës”* dhe në pikën e pestë është hequr togfjalëshi *“dhe vonesa në zbatimin e projekteve.”*

Lidhur me sugjerimin që kudo në përmbajtjen e projektvendimit togfjalëshi *“Ligji nr. 22/2018, “Për strehimin Social”*, të ndryshohet me *“Ligji nr. 22/2018, “Për strehimin social”*, i ndryshuar, është reflektuar.

Këshilli Konsultativ i Qeverisjes Qendrore dhe Vetëqeverisjes Vendore ka shprehur dakortësinë nëpërmjet Vendimit nr. 8, datë 11.12.2025, *“Për miratimin e projektakteve objekt konsultimi në mbledhjen e Këshillit Konsultativ, Qeverisje Qendrore- Vetëqeverisje Vendore të datës 09/12/2025.*

Instituti i Statistikave ka dërguar me anë të e-mail komentet në brendësi të dokumentit, të cilat janë reflektuar sipas sugjerimeve të dhëna.

Projektvendimi është dërguar për bashkërendim në Ministrinë e Financave, Ministrinë e Ekonomisë dhe Inovacionit, Ministrinë e Arsimit, Ministrin e Shtetit për Pushtetin Vendor dhe Institutin e Statistikave.

Ministri i Shtetit për Pushtetin Vendor dhe Ministri i Shtetit dhe Kryenegociator janë shprehur dakord.

Ministria e Arsimit është shprehur parimisht dakord me disa sugjerime lidhur me planin e veprimit si më poshtë:

Është reflektuar saktësimi i referencës 22, në faqen 44, të këtij plani.

Është hequr Ministria e Arsimit si institucion financues, në masën 2, në faqen 73 të planit.

Është riformuluar masa 3.1 *“Ofrimi i bursave për nxënësit e shkollave të mesme që janë në rrezik varfërie dhe përjashtimi social, për të zvogëluar barrierat ekonomike dhe për të parandaluar braktisjen e parakohshme të shkollës”*, në faqen 78 të planit duke u bazuar në VKM nr. 666/2019, i ndryshuar, si më poshtë:

*“Ofrimi i mbështetjes financiare përmes bursave për nxënësit e arsimit parauniversitar dhe atij profesional, me qëllim parandalimin e braktisjes shkollore dhe reduktimin e barrierave ekonomike, sipas kriteve dhe kategorive të përcaktuara në legjislacion”.*

Ministria e Ekonomisë dhe Inovacionit është shprehur parimisht dakort ku janë reflektuar të gjithë sugjerimet si më poshtë:

Lidhur me kostot e buxhetit për strehimin (Aneksi 3), është pasqyruar argument shtesë në relacion në Raportin e Vlerësimit të të Ardhurave dhe Shpenzimeve Buxhetore, ku theksohet se është përfshirë buxheti i strehimit i parashikuar.

Lidhur me pikën 7.6 ku trajtohet hollësisht strehimi, është hequr paragrafi *“Procesi i miratimit të aplikimeve është gjithashtu i gjatë, zakonisht mbi 6 muaj dhe nuk u përgjigjet nevojave emergjente të strehimit, si në rastet e dhunës në familje ose dëmtimit të papritur të banesës”.*

Lidhur me paragrafin e parafundit në kapitullin 3 *“Për familjet me fëmijë në vështirësi strehimi, Ligji Nr. 22/2018 “Për strehimin social”, i ndryshuar parashikon subvencione qiraje, kriterë përparësie për familjet me fëmijë, dhe detyra për njësitë vendore për të hartuar regjistra të strehimit social”*, është ndryshuar si vijon: *“Për familjet me fëmijë në vështirësi strehimi, Ligji Nr. 22/2018 “Për strehimin social”, i ndryshuar, parashikon për çdo program strehimi, kriterë përparësie për familjet me fëmijë dhe detyra për njësitë vendore për të hartuar regjistra të strehimit social”.*

Lidhur me heqjen nga fusha e përgjegjësisë së Ministrisë së Ekonomisë dhe Inovacionit (MEI) për objektivat 1.2.1 dhe 1.2.2, sqarojmë se MEI nuk është institucion përgjegjës, por institucion kontribues. Ndërsa vlerësimi i nevojave për strehim social dhe zbatimi i masave në terren mbetet përgjegjësi e bashkive, roli i MEI-t në këtë proces fokusohet specifikisht në përditësimin dhe rishikimin e Strategjisë Kombëtare të Strehimit deri në vitin 2030, për të reflektuar nevojat e reja, që do të dalin nga analizat dhe studimet e planifikuara.

Ministria e Financave është shprehur parimisht dakort me disa sugjerime, të cilat janë reflektuar në pjesën e Raportit të Vlerësimit të të Ardhurave dhe Shpenzimeve Buxhetore.

Lidhur me sugjerimet e Institutit të Statistikave dërguar nëpërmjet email zyrtar sqarojmë se janë reflektuar në përmbajtje të planit të veprimit.

Me shkresën nr.1493 prot., datë 05.03.2026 projektvendimi është dërguar për ribashkërendim në Ministrinë e Financave, Ministrinë e Arsimit dhe Ministrinë e Ekonomisë dhe Inovacionit të cilat janë shprehur parimisht dakord.

## **IX. RAPORTI I VLERËSIMIT TË TË ARDHURAVE DHE SHPENZIMEVE BUXHETORE**

Kostoja e përgjithshme e përlllogaritur për zbatimin e këtij plani veprimi është rreth 50,364,442,817 lekë për një periudhë pesëvjeçare, nga ku 38,767,130,120 lekë mbulohen nga buxheti i shtetit, 2,196,819,000 mbulohen nga partnerë strategjikë dhe hendeku financiar është 9,400,493,697 lekë.

Burimet e përcaktuara për Ministrinë e Shëndetësisë dhe Mirëqenies Sociale për programin buxhetor “Përkujdesi social” mbulojnë rreth 42% të kostos së përlllogaritur për këtë plan veprimi, ndjekur nga programet “Kujdesi shëndetësor parësor” dhe “Shëndeti publik”, me 16% të kostos. Ministria e Arsimit është përgjegjëse për 39% të kostove të zbatimit të Planit të Veprimit, me programet buxhetore “Arsimi bazë” dhe “Arsimi i mesëm i lartë”, ndjekur nga Ministria e Ekonomisë dhe Inovacionit me 2%, në të cilin është përfshirë fondi i programit buxhetor “Strehimi social”.

Kostoja financiare për zbatimin e masave dhe objektivave për vitin 2026 do të mbulohet brenda tavanëve të shpenzimeve të miratuara në PBA 2026-2028 për secilin institucion. Kjo përfshin koston e vlerësimeve, aktiviteteve administrative, rritjen e kapaciteteve institucionale dhe njerëzore, si dhe ofrimin e shërbimeve për fëmijët.

Sa i përket periudhës në vijim, zbatimi i masave do t'i nënshtrohet procedurave vjetore të përgatitjes së projektbuxhetit, ku rishikohen tavanet afatmesme. Për objektivat që konsiderohen politika të reja apo që kërkojnë financim shtesë, kërkesat do të paraqiten zyrtarisht gjatë dy fazave të procesit të planifikimit të PBA-së, në përputhje me ligjin nr. 9936, datë 26.6.2008, “Për menaxhimin e sistemit buxhetor në Republikën e Shqipërisë”, i ndryshuar, i cili përcakton rregullat për hartimin dhe rishikimin e përvitshëm të PBA-së.

Kostoja e planit të veprimit specifikon për çdo objektiv dhe nënobjektiv lidhjen me programin buxhetor sipas fushave kryesore që mbulon strategjia. Burimet financiare nga partnerët e zhvillimit mbulojnë 4% të kostos së strategjisë dhe hendeku financiar është 19% sipas tabelës bashkëlidhur relacionit.

Gjatë parashikimit të masave dhe kostimit të tyre, është marrë në konsideratë me vëmendje të veçantë financimi i shërbimeve për fëmijët, si edhe roli thelbësor që bashkitë luajnë në këtë

kuadër. Një pjesë e konsiderueshme e financimit për shërbime sociale, arsimore, shëndetësore dhe për strehimin në nivel bashkie financohen nga buxheti i shtetit, nëpërmjet programeve buxhetore përkatëse nga MSHMS, MA dhe MEI.

Më konkretisht:

Objektivi 1: Mbrojtja dhe mirëqenia e fëmijëve:

- 1.1 Objektivi Specifik I.1: Krijimi i një sistemi gjithëpërfshirës dhe të barabartë të përfitimeve për fëmijë që siguron një standard bazë jetese- parashikohet të mbulohet plotësisht nga buxheti i MSHMS, në mënyrë të ngjashme me administrimin e programit të ndihmës ekonomike
- 1.2 Objektivi specifik I.2: Garantimi i mbështetjes financiare dhe shërbime të integruara për fëmijët me aftësi të kufizuara parashikohet të mbulohet plotësisht nga buxheti i MSHMS, në mënyrë të ngjashme me administrimin e programit të pagesave të paaftësisë.
- 1.3 Objektivi specifik I.3: Garantimi i aksesit për fëmijët vulnerabël në shërbime sociale të integruara, cilësore dhe të bazuara në komunitet, nëpërmjet një ekipi të profesionalizuar dhe koordinimit ndërsektorial, parashikohen forcimi i kapaciteteve të specialistëve dhe hartimi i protokolleve të punës me financim nga buxheti MSHMS dhe donatorë.
- 1.4 Objektivi specifik I.4: Forcimi i mirëqenies së fëmijës dhe familjes përmes mbrojtjes gjithëpërfshirëse, të bazuar në komunitet dhe të specializuar për fëmijët në rrezik. Roli i bashkive është i rëndësishëm për arritjen e këtij objekti specifik. Është parashikuar që një pjesë e financimeve të fondit social për bashkitë do të priorizohen për këtë masë (në përputhje me PBA), si edhe parashikohen financime nga bashkitë për zbatimin e programeve, të cilat janë edhe aktualisht pjesë e kompetencave të tyre, në veçanti për programet e prindërimit (një pjesë e qendrave sociale komunitare i zhvillojnë edhe sot, si dhe për trajnimin e fëmijëve migrant, ku punonjësi për mbrojtjen e fëmijës në nivel bashkie, kryen edhe sot menaxhimin e rastit në përputhje me kompetencat ligjore.
- 1.5 Objektivi specifik I.5: Fuqizimi dhe zgjerimi i shërbimeve me bazë komunitare për fëmijët me aftësi të kufizuara përmes mbështetjes me ekipi lëvizëse, ndihmësve personalë të trajnuar dhe identifikimit të hershëm. Gjithashtu, në këtë masë është parashikuar që do akordohen rreth ¼ e financimeve të Fondit Social për bashkitë, për të mbështetur zgjerimin e shërbimeve me bazë komunitare. Kuadri rregullator për Fondin Social është rishikuar së fundmi, pikërisht për t'u dhënë përparësi bashkive të vogla me mundësi më të vogla financiare.
- 1.6 Objektivi specifik I.6: Sigurimi i aksesit universal dhe të barabartë në shërbimet e shëndetit dhe zhvillimit të fëmijës përmes zgjerimit të shërbimeve në terren, forcimit të llogaridhënies dhe nxitjes së identifikimit të hershëm dhe përfshirjes. Në këtë masë roli kryesor u takon shërbimeve parësore shëndetësore, si dhe organeve të arsimit, pavarësisht se pjesëmarrja dhe roli i bashkive mbetet i domosdoshëm.

## Objektivi 2: Edukimi e kujdesi në fëmijërinë e hershme:

- 2.1 Objektivi specifik II.1. Zbatimi i masave që promovojnë aksesin gjithëpërfshirës dhe përmirësojnë cilësinë e shërbimeve të edukimit dhe kujdesit në fëmijërinë e hershme (0-6), me vëmendje të veçantë të fëmijët nga familje me të ardhura të ulëta dhe zona të largëta. në këtë objektiv specifik janë parashikuar investime për objekte të arsimit parashkollor sipas programit Arsimi bazë i MA dhe nga Bashkitë.
- 2.2 Objektivi specifik II.2. Përmirësimi i cilësisë së edukimit dhe kujdesit në fëmijërinë e hershme përmes standardeve të harmonizuara, kurrikulës dhe zhvillimit profesional, parashikon ndryshime rregullatore dhe metodologjike të udhëhequra nga Ministria e Arsimit dhe Agjencia për Sigurimin e Cilësisë në Arsimin Parauniversitar.

## Objektivi 3: Arsimi

- 3.1 Objektivi Specifik III.1: Trajtimi i pengesave financiare dhe jofinanciare për pjesëmarrjen në shkollë- parashikon unifikimin e përfitimeve financiare për fëmijët në situata të cenueshme dhe rritjen e tyre graduale. Vërejmë që këto përfitime financohen plotësisht nga MA dhe lëvrohen nga bashkitë.
- 3.2 Objektivi Specifik III. 2: Pajisja e shkollave për të qenë gjithëpërfshirëse dhe për të promovuar mjedise të barabarta mësimore. Këto masa parashikojnë përshtatjen e arsyeshme të shkollave për fëmijët me aftësi ndryshe, zgjerimin e programeve komunitare dhe diversifikimin e materialeve mësimore për qasje më të lehtë nga gjithë fëmijët. Kostimi është bërë në bazë të PBA, planeve strategjike të MA-së.

## Objektivi 4: Ofrimi i shërbimeve thelbësore shëndetësore për të gjithë fëmijët

- 4.1 Objektivi specifik IV.1: Garantimi i aksesit të barabartë në shërbimet thelbësore dhe të integruara të shëndetësore për fëmijët, me fokus në kategoritë në rrezik. Kjo masë financohet kryesisht nga Programi Kujdesi Shëndetësor Parësor dhe Programi Shëndeti Publik të MSHMS-së.
- 4.2 Objektivi specifik IV.2: Zgjerimi i aksesit në shërbime të decentralizuara dhe gjithëpërfshirëse të shëndetit mendor për fëmijët në nivelin e kujdesit komunitar. Kjo masë financohet kryesisht nga Programi Kujdesi Shëndetësor Parësor dhe Programi Shëndeti Publik të MSHMS-së.

## Objektivi 5: Sigurimi i ushqyerjes së shëndetshme për të gjithë fëmijët

- 5.1 Objektivi specifik V.1: Sigurimi i aksesit në ushqim të shëndetshëm për të gjithë fëmijët në nevojë, një pjesë e kostove për ofrimin e ushqimit për fëmijët vulnerabël parashikohet të mbulohet nga donatorët përmes programeve të ndryshme.
- 5.2 Objektivi specifik V.2: Akses universal në vakte të shëndetshme në shkolla për të përmirësuar mirëushqyerjen, të nxënit dhe barazinë (duke synuar shkollat publike 9-

vjeçare). Programi i ushqimit në shkolla (aktualisht i pafinancuar) parashikohet të mbulohet nga burime të buxhetit të shtetit.

Objektivi 6: Objektivi specifik VI.1 Transformimi i politikave dhe sistemeve të strehimit drejt një qasjeje gjithëpërfshirëse, të orientuar nga fëmijët dhe bazuar në parimet e barazisë:

6.1 Objektivi specifik VI.1 Transformimi i politikave dhe sistemeve të strehimit drejt një qasjeje gjithëpërfshirëse, të orientuar nga fëmijët dhe bazuar në parimet e barazisë, parashikon rishikime të kuadrit rregullator, nën kompetencën e MEI-t.

6.2 Objektivi Specifik 2: Zgjerimi i aksesit në zgjidhje sensitive për strehimin e fëmijëve, përmes shërbimit të strehimit tranzitor, emergjente dhe afatgjatë të përshtatur për familjet dhe fëmijët në situata të cënueshme. Kujtojmë që financimi i programeve të strehimit social mbulohet plotësisht nga programi përkatës i MEI-t dhe lëvrimi bëhet nga bashkitë.

## **PROPOZUESI**

**MINISTRI I SHËNDETËSISË DHE MIRËQENIES SOCIALE**

**Evis SALA**

	Gjithsej	Burimi i financimit		Hendeku
		Buxheti	Partnerë strategjik	
<b>I. MBROJTJA DHE MIRËQENIA E FËMIJËVE</b>				
Objektivi specifik I.1: Krijimi i një sistemi gjithëpërfshirës dhe të barabartë të përfitimeve për fëmijët që siguron një standard bazë jetese për ta.	11 572 776 923	11 564 676 923	8 100 000	-
Objektivi specifik I.2 Garantimi i mbështetjes financiare dhe me shërbime të specializara dhe komunitare të integruara për fëmijët me aftësi të kufizuara	3 321 680 000	3 101 310 000	-	220 370 000
Objektivi specifik I.3: Garantimi i aksesit për fëmijët vulnerabël në shërbime sociale të integruara, cilësore dhe të bazuara në komunitet, nëpërmjet ekipve profesionale dhe bashkëpunimit ndërsektorial	13 936 000	6 480 000	4 000 000	3 456 000
Objektivi specifik I.4: Rritja e mirëqenies së fëmijës dhe familjes përmes mbrojtjes gjithëpërfshirëse dhe shërbimeve të specializuara të mbrojtjes për fëmijët në rrezik	1 298 382 303	859 406 303	62 580 000	376 396 000

Objektivi specifik I.5: Fuqizimi dhe zgjerimi i shërbimeve me bazë komunitare për fëmijët me aftësi të kufizuara përmes mbështetjes me ekipi lëvizëse, ndihmësve personalë të trajnuar dhe identifikimit të hershëm.	1 481 981 917	1 363 469 917	4 200 000	114 312 000
Objektivi specifik I.6: Sigurimi i aksesit universal dhe të barabartë në shërbimet e shëndetit dhe zhvillimit të fëmijës përmes zgjerimit të shërbimeve në terren, forcimit të llogaridhënies dhe nxitjes së identifikimit të hershëm dhe përfshirjes.	44 200 000	-	34 600 000	9 600 000
<b>MBROJTJA DHE MIRËQENIA E FËMIJËVE (total)</b>	<b>17 732 957 143</b>	<b>16 895 343 143</b>	<b>113 480 000</b>	<b>724 134 000</b>
<b>II. EDUKIMI E KUJDESI NË FEMIJERINE E HERSHME (EKHF)</b>				
Objektivi specifik II.1. Zbatimi i masave që promovojnë aksesin gjithëpërfshirës dhe përmirësojnë cilësinë e shërbimeve të edukimit dhe kujdesit në fëmijërinë e hershme (0-6), me vëmendje të veçantë të fëmijët nga familje me të ardhura të ulëta dhe zona të largëta.	2 414 173 680	2 408 413 680	5 760 000	-
Objektivi specifik II.2. Përmirësimi i cilësisë së edukimit dhe kujdesit në fëmijërinë e	16 200 000	16 200 000	-	-

hershme përmes standardeve të harmonizuara, kurrikulës dhe zhvillimit profesional.				
<b>EDUKIMI E KUJDESI NË FEMIJERINE E HERSHME (EKHF) (total)</b>	<b>2 430 373 680</b>	<b>2 424 613 680</b>	<b>5 760 000</b>	<b>-</b>
<b>III. ARSIMI</b>				
Objektivi specifik III.1: Trajtimi i pengesave financiare dhe jofinanciare për pjesëmarrjen në shkollë	12 298 663 000	12 295 663 000	3 000 000	-
Objektivi specifik III. 2: Pajisja e shkollave për të qenë gjithëpërfshirëse dhe për të promovuar mjedise të barabarta mësimore	868 400 000	651 200 000	102 000 000	115 200 000
<b>ARSIMI (total)</b>	<b>13 167 063 000</b>	<b>12 946 863 000</b>	<b>105 000 000</b>	115 200 000
<b>IV. SHËNDETËSIA</b>				
Objektivi specifik IV.1: Garantimi i aksesit të barabartë në shërbimet shëndetësore thelbësore dhe të integruara të shëndetësore për fëmijët, me fokus në kategoritë në rrezik	8 231 253 900	4 814 216 150	1 792 357 000	1 624 680 750
Objektivi specifik IV.2: Zgjerimi i aksesit në shërbime të decentralizuara dhe gjithëpërfshirëse të shëndetit mendor për fëmijët në nivelin e kujdesit komunitar.	669 103 875	631 361 875	15 742 000	22 000 000

<b>OFRIMI I SHËRBIMEVE BAZË SHËNDETËSORE PËR TË GJITHË FËMIJËT (total)</b>	<b>8 899 157 775</b>	<b>5 445 578 025</b>	<b>1 808 099 000</b>	<b>1 645 480 750</b>
<b>V. USHQYERJA</b>				
Objektivi specifik V. 1: Sigurimi i aksesit në ushqim të shëndetshëm për të gjithë fëmijët në nevojë	315 300 000	27 000 000	113 000 000	175 300 000
Objektivi specifik V. 2: Akses universal në vakte të shëndetshme në shkolla për të përmirësuar mirëushqyerjen, të nxënit dhe barazinë (duke synuar shkollat publike 9-vjeçare)	6 703 550 000	22 000 000	12 300 000	6 669 250 000
<b>USHQYERJA (total)</b>	<b>7 018 850 000</b>	<b>49 000 000</b>	<b>125 300 000</b>	<b>6 844 550 000</b>
<b>VI. STREHIMI</b>				
Objektivi specifik VI.1 Transformimi i politikave dhe sistemeve të strehimit drejt një qasjeje gjithëpërfshirëse, të orientuar nga fëmijët dhe bazuar në parimet e barazisë	11 500 000	-	7 500 000	4 000 000
Objektivi specifik 2: Zgjerimi i aksesit në zgjidhje sensitive për strehimin e fëmijëve, përmes shërbimit të strehimit tranzitor,	1 104 440 167	1 005 732 272	-	98 707 895

emergjente dhe afatgjatë të përshtatur për familjet dhe fëmijët në situata të cënueshme				
<b>STREHIMI (total)</b>	<b>1 084 361 220</b>	<b>1 005 732 272</b>	<b>7 500 000</b>	<b>71 128 947</b>
<b>0. Koordinim, komunikim, vlerësim dhe monitorim</b>	31 680 000	-	31 680 000	-
<b>Gjithsej buxheti Garancia për Fëmijët</b>	<b>50 364 442 817</b>	<b>38 767 130 120</b>	<b>2 196 819 000</b>	<b>9 400 493 697</b>
<b>Në përqindje</b>	<b>100%</b>	<b>77%</b>	<b>4%</b>	<b>19%</b>